

# 阿毗達磨法蘊足論卷第一

尊者大目乾連造

三藏法師玄奘奉 詔譯

## 學處品第一

稽首佛法僧，眞淨無價寶，今集諸法蘊，普施諸群生。

阿毗達磨如大海，大山大地大虛空，具攝無邊聖法財，今我正勤略顯示。  
唵陀南曰：

學支淨果行聖種，正勝足念諦靜慮，無量無色定覺支，雜根處蘊界緣起。  
一時薄伽梵，在室羅筏，住逝多林給孤獨園。爾時世尊，告苾芻衆：諸有於彼，五怖罪  
怨，不寂靜者，彼於現世，爲諸聖賢同所訶厭，名爲犯戒自損傷者，有罪有貶，生多非  
福，身壞名終，墮險惡趣，生地獄中。何等爲五？謂殺生者，殺生緣故，生怖罪怨，不離殺  
生，是名第一。不與取者，劫盜緣故，生怖罪怨，不離劫盜，是名第二。欲邪行者，邪行緣

故，生怖罪怨，不離邪行，是名第三。虛誑語者，虛誑緣故，生怖罪怨，不離虛誑，是名第四。飲味諸酒放逸處者，飲味諸酒放逸處緣故，生怖罪怨，不離飲酒諸放逸處，是名第五。有於如是五怖罪怨，不寂靜者，彼於現世，爲諸聖賢同所訶厭，名爲犯戒自損傷者，有罪有貶，生多非福，身壞命終，墮險惡趣，生地獄中。諸有於彼，五怖罪怨，能寂靜者，彼於現世，爲諸聖賢同所欽歎，名爲持戒自防護者，無罪無貶，生多勝福，身壞命終，升安善趣，生於天中。何等爲五？謂離殺生者，離殺生緣故，滅怖罪怨，能離殺生，是名第一。離不與取者，離劫盜緣故，滅怖罪怨，能離劫盜，是名第二。離欲邪行者，離邪行緣故，滅怖罪怨，能離邪行，是名第三。離虛誑語者，離虛誑緣故，滅怖罪怨，能離虛誑，是名第四。離飲諸酒放逸處者，離飲諸酒放逸處緣故，滅怖罪怨，能離飲酒諸放逸處，是名第五。有於如是五怖罪怨，能寂靜者，彼於現世，爲諸聖賢同所欽歎，名爲持戒自防護者，無罪無貶，生多勝福，身壞命終，升安善趣，生於天中。爾時世尊，爲攝前義，而說頌曰：

諸行殺盜姪，虛誑耽諸酒，五怖罪怨縛，聖賢所訶厭；

名犯戒自傷，有罪招非福，死墮險惡趣，生諸地獄中。

諸離殺盜姪，虛誑耽諸酒，五怖罪怨脫，聖賢所欽歎；

名持戒自防，無罪感勝福，死升安善趣，生諸天界中。

齊何名曰鄔波索迦？謂諸在家白衣男子，男根成就，歸佛法僧，起殷淨心，發誠諦語，自稱我是鄔波索迦，願尊憶持慈悲護念，齊是名曰鄔波索迦。此何名爲能學一分？謂前所說鄔波索迦，歸佛法僧，發誠言已，唯能離殺，不離餘四，如是名爲能學一分。復何名爲能學少分？謂如前說鄔波索迦，歸佛法僧，發誠言已，能離殺盜，不離餘三，如是名爲能學少分。復何名爲能學多分？謂前所說鄔波索迦，歸佛法僧，發誠言已，離殺盜姪，不離餘二，如是名爲能學多分。復何名爲能學滿分？謂前所說鄔波索迦，歸佛法僧，發誠言已，具能離五，如是名爲能學滿分。

成就五法鄔波索迦，唯能自利，不能利他，何等爲五？謂前所說鄔波索迦，自離殺生，乃至飲酒諸放逸處，不能勸他，令離殺生，乃至飲酒諸放逸處，如是名爲成就五法鄔波索迦，唯能自利，不能利他。成就十法鄔波索迦，能利自他，不能廣利，何等爲十。

謂前所說鄔波索迦，自離殺生，乃至飲酒諸放逸處，亦能勸他，令離殺生，乃至飲酒諸放逸處，不能見餘能離殺等歡喜慶慰；如是名爲成就十法鄔波索迦，能利自他，不能廣利。成就十五法鄔波索迦，能利自他，亦能廣利。何等十五？謂前所說鄔波索迦，自離殺生，乃至飲酒諸放逸處，亦能勸他，令離殺生，乃至飲酒諸放逸處，及能見餘離殺生等歡喜慶慰；如是名爲成就十五法鄔波索迦，能利自他，亦能廣利。成就八法鄔波索迦，唯能自利，不能利他。何等爲八？謂前所說鄔波索迦，自具淨信，不能勸他，令具淨信；自具淨戒，不能勸他，令具淨戒；自具惠捨，不能勸他，令具惠捨；自能策勵，數往伽藍，禮觀有德諸苾芻象，不能勸他，令其策勵，數往伽藍，禮觀有德諸苾芻象；自能至誠，聽聞正法，不能勸他，令其至誠，聽聞正法；自聞法已，能持不忘，不能勸他，令持不忘；自持法已，能思擇義，不能勸他，令思擇義；自思擇已，爲證法義，能正勤脩法隨法行，成和敬行隨法行者，不能勸他，令正勤脩法隨法行，成和敬行隨法行者；如是名爲成就八法鄔波索迦，唯能自利，不能利他。成就十六法鄔波索迦，能利自他，不能廣利，何等十六？謂前所說鄔波索迦，自具淨信，亦能勸他，令具淨信；廣

說乃至自思擇已，爲證法義，能正勤脩法隨法行，成和敬行隨法行者，亦能勸他，令正勤脩法隨法行，成和敬行隨法行者；不能見餘具淨信等歡喜慶慰；如是名爲成就十六法鄔波索迦，能利自他，不能廣利。成就二十四法鄔波索迦，能利自他，亦能廣利，何等名爲二十四法？謂前所說鄔波索迦，自具淨信，亦能勸他，令具淨信；廣說乃至自思擇已，爲證法義，能正勤脩法隨法行，成和敬行隨法行者，亦能勸他，令正勤脩法隨法行，成和敬行隨法行者；及能見餘具淨信等歡喜慶慰；如是名爲成就二十四法鄔波索迦，能利自他，亦能廣利。

成就十法，身壞命終，墮險惡趣，生地獄中。何等爲十？一、殺生，二、不與取，三、欲邪行，四、虛誑語，五、離間語，六、麤惡語，七、雜穢語，八、貪欲，九、瞋恚，十、邪見。若有成就如是十法，身壞命終，墮險惡趣，生地獄中。

成就十法，身壞命終，升安善趣，生於天中。何等爲十？一、離殺生，二、離不與取，三、離欲邪行，四、離虛誑語，五、離離間語，六、離麤惡語，七、離雜穢語，八、無貪，九、無瞋，十、正見。若有成就如是十法，身壞命終，升安善趣，生於天中。

成就二十法，身壞命終，墮險惡趣，生地獄中。何等二十？謂自殺生，亦勸他殺；廣說乃至自起邪見，亦復勸他令起邪見；若有成就此二十法，身壞命終，墮諸惡趣，生地獄中。

成就二十法，身壞命終，升安善趣，生於天中。何等二十？謂自離殺，亦能勸他，令其離殺；廣說乃至自起正見，亦能勸他令起正見；若有成就此二十法，身壞命終，升安善趣，生於天中。

成就三十法，身壞命終，墮險惡趣，生地獄中。何等三十？謂自不離殺，勸他令殺，見不離殺，歡喜慰喻；廣說乃至自起邪見，亦復勸他，令起邪見，見起邪見，歡喜慰喻；若有成就此三十法，身壞命終，墮險惡趣，生地獄中。

成就三十法，身壞命終，升安善趣，生於天中。何等三十？謂自離殺生，勸他離殺，見餘離殺，歡喜慰喻；廣說乃至自起正見，亦復勸他令起正見，見起正見，歡喜慰喻；若有成就此三十法，身壞命終，升安善趣，生於天中。

成就四十法，身壞命終，墮險惡趣，生地獄中。何等四十？謂自不離殺，勸他令殺，見不

離殺，歡喜慰喻，稱揚讚歎殺生者事；廣說乃至自起邪見，亦復勸他令起邪見，見起邪見，歡喜慰喻，稱揚讚歎邪見者事；若有成就此四十法，身壞命終，墮險惡趣，生地獄中。

成就四十法，身壞命終，升安善趣，生於天中。何等四十？謂自離殺生，勸他離殺，見餘離殺，歡喜慰喻，稱揚讚歎離殺者事；廣說乃至自起正見，亦復勸他令起正見，見起正見，歡喜慰喻，稱揚讚歎正見者事；若有成就此四十法，身壞命終，升安善趣，生於天中。

鄔波索迦，有五學處。何等爲五？乃至命終，遠離殺生，是名第一；乃至命終，離不與取，是名第二；乃至命終，離欲邪行，是名第三；乃至命終，離虛誑語，是名第四；乃至命終，離飲諸酒諸放逸處，是名第五。

於第一中，且何名爲能殺生者？如世尊說：有殺生者，暴惡血手，耽著殺害，於諸有情衆生勝類，無羞無慙，下至摺多比畢洛迦，皆不離殺，如是名爲能殺生者。何等名爲有殺生者？謂於殺生，不深厭患，不遠不離，安住成就，如是名爲有殺生者。何名暴惡？

謂集種種弓刀杖等，諸殺害具，是名暴惡。何名血手？謂諸屠羊、屠雞、屠猪、捕鳥、捕魚、獵師、劫盜、魁膾、縛籠、守獄、煮狗、施置、涼等，是名血手。何故此等名爲血手？謂彼雖數沐浴塗香，服鮮淨衣，首冠花鬘，身飾嚴具，而名血手，所以者何？彼於惡事，不深厭患，不遠不離，令有情血起等起，生等生，積集流出，故名血手。何等名爲耽著殺害？謂於衆生，有害非殺，有害亦殺；害非殺者，謂以種種弓刀杖等，諸殺害具，逼惱衆生，未全斷命，如是名爲有害非殺；害亦殺者，謂以種種弓刀杖等，諸殺害具，逼惱衆生，亦全斷命，如是名爲有害亦殺；於殺害事，耽樂執著，如是名爲耽著殺害。何等名爲於諸有情，衆生勝類，無羞無慙，且辯衆生勝類差別？謂諸異生，說名衆生；世尊弟子，說名勝類。又諸有情，有貪瞋癡，說名衆生；若諸有情，離貪瞋癡，說名勝類。又諸有情，有愛有取，說名衆生；若諸有情，離愛離取，說名勝類。又諸有情，有順無違，說名衆生；若諸有情，無順有違，說名勝類。又諸有情，無聰慧，有無明，說明衆生；若諸有情，聰慧有明，說名勝類。又諸有情，未離欲貪，說名衆生；若諸有情，已離欲貪，說名勝類。又諸有情，未離欲貪，非佛弟子，說名衆生；若諸有情，已離欲貪，是佛弟子，說名勝類。今此義中

若諸異生，說名衆生；世尊弟子，說名勝類。所以者何？勝謂涅槃，彼能獲得成就獨證，故名勝類。如有頌言：

普隨順世間，周遍歷方邑，欲求於勝我，無所證無依。

故此義中，若諸異生，說名衆生；世尊弟子，說名勝類；於此有情衆生勝類，應羞應慙。而於其中，無慚無羞，無悔無恥，無哀無慙，無傷無念，如是名爲於諸有情，衆生勝類，無羞無慙。何等名爲下至摺多比畢洛迦，皆不離殺？言摺多者，謂蚊蚋等諸小蟲類；比畢洛迦，卽諸蟻子；下至此類微碎衆生，皆起惡心，欲興殺害，是故名爲能殺生者。卽於此中，何名爲生？何名殺生？何等名爲遠離殺生？而說名爲乃至命終，遠離殺生。卽波索迦第一學處，所言生者，謂諸衆生，有衆生想；若諸有情，有有情想；若諸命者，有命者想；若諸養育，有養育想；若補特伽羅，有補特伽羅想；是名爲生。言殺生者，謂於衆生，起衆生想，於諸有情，起有情想，於諸命者，起命者想，於諸養育，起養育想，於補特伽羅，起補特伽羅想，復起惡心，不善心，損心，害心，殺心現前；依如是業，如是加行，如是思維，如是策勵，如是勇猛，殺害衆生，故思斷命；由如是業，如是加行，如是思

維如是策勵，如是勇猛，殺害衆生，故思斷命，名爲殺生。卽前所說鄔波索迦，於此殺生，能善思擇，厭患遠離，止息防護，不作不爲，不行不犯，棄捨堰塞，不拒不逆，不違不越，如是名爲遠離殺生。是故說名乃至命終，遠離殺生，鄔波索迦第一學處。

於第二中，且何名爲不與取者？如世尊說：有不與取者，或城邑中，或阿練若，不與物數，劫盜心取，不離劫盜，如是名爲不與取者。何等名爲有不與取者？謂於不與取，不深厭患，不遠不離，安住成就，如是名爲有不與取者。何等名爲或城邑中，謂有城墻，周匝圍遶，何等名爲或阿練若？謂無城墻，周匝圍遶，何名不與？謂他攝受，不捨不棄，不惠不施。何等名物？謂他攝受，有情無情，諸資生具，卽此名爲不與物數。何等名爲劫盜心取，不離劫盜？謂卽所說，不與物數，懷賊心取，不厭遠離，如是名爲不與物數，劫盜心取，不離劫盜，是故名爲不與取者。卽於此中，何名不與？何名不與取？何名離不與取？而說名爲乃至命終，離不與取，鄔波索迦第二學處。言不與者，謂他攝受有情無情，諸資生具，不捨不棄，不惠不施，是名不與。不與取者，謂於他攝受諸資生具，起他攝受，及不與想，復起惡心，不善心，劫心，盜心，執心，著心，取心現前，依如是業，如

是加行，如是思維，如是策勵，如是勇猛，如是門，如是路，於他攝受諸資生具，以執著取，劫盜故思舉離本處，由如是業，如是加行，如是思惟，如是策勵，如是勇猛，如是門，如是路，於他攝受諸資生具，以執著取，劫盜故思舉離本處，名不與取。卽前所說鄔波索迦，於不與取，能善思擇，厭患遠離，止息防護，不作不爲，不行不犯，棄捨堰塞，不拒不逆，不違不越，如是名爲離不與取。是故說名乃至命終，離不與取，鄔波索迦第二學處。

於第三中，且何名爲欲邪行者？如世尊說：有欲邪行者，於他女婦，他所攝受，謂彼父母，兄弟，姊妹，舅姑，親眷，宗族守護，有罰有障，有障罰俱，下至授擲花鬘等信，於是等類，起欲煩惱，招誘強抑，共爲邪行，不離邪行，如是名爲欲邪行者。何等名爲有欲邪行者？謂於欲邪行，不深厭患，不遠不離，安住成就，如是名爲有欲邪行者。他女婦者，謂七種婦：何等爲七？一、授水婦，二、財貨婦，三、軍掠婦，四、意樂婦，五、衣食婦，六、同活婦，七、須臾婦。授水婦者，謂女父母，授水與男，以女妻之，爲彼家主，名授水婦。財貨婦者，謂諸丈夫，以少多財，貿易他女，將爲己婦，名財貨婦。軍掠婦者，謂有丈夫，因伐他國，

抄掠他女，將爲己婦；復有國王，因破敵國，取所欲己，餘皆棄捨；有諸丈夫，力攝他女，將爲己婦；如是等類，名軍掠婦。意樂婦者，謂有女人，於男子家，自信愛樂，願住爲婦，名意樂婦。衣食婦者，謂有女人，於男子家，爲衣食故，願住爲婦，名衣食婦。同活婦者，謂有女人，詣男子家，謂男子曰：我持此身，願相付託，彼此所有，共爲無二，互相存濟，以盡餘年，冀有子孫，歿後承祭，名同活婦。須臾婦者，謂有女人，樂與男子，暫時爲婦，名須臾婦。他攝受中，母守護者，謂有女人，其父或狂，或復心亂，或憂苦逼，或已出家，或遠逃逝，或復命終，其母孤養，防守遮護，私誠女言：諸有所作，必先白我，然可得爲，名母守護。父守護者，謂有女人，其母或狂，或復心亂，廣說乃至，或復命終，其父孤養，防守遮護，私誠如前，名父守護。兄弟守護者，謂有女人，父母或狂，或復心亂，廣說乃至，或復命終，兄弟孤養，防守遮護，私勸誠言：諸有所作，必先告白，然可得爲，名兄弟守護。姊妹守護者，謂有女人，父母或狂，或復心亂，廣說乃至，或復命終，姊妹孤養，防守遮護，勸誠如前，名姊妹守護。舅姑守護者，謂有女人，其夫或狂，或復心亂，廣說乃至，或復命終，依舅姑居，舅姑喻曰：爾勿愁惱，宜以自安，衣食之資，悉以相結。我當憂

念，如子不殊，舅姑恩恤，防守遮護，私誠之言：諸有所作，必先諮白，然可得爲，名舅姑守護。親眷守護者，謂有女人，除母及夫，餘異姓親，名爲親眷，而此女人，爲彼親眷，防守遮護，名親眷守護。宗族守護者，謂有女人，除父兄等，餘同姓親，名爲宗族，而此女人，爲彼宗族，防守遮護，名宗族守護。言有罰者，謂有女人，自無眷屬，又非姪女，若有凌逼，爲王所知，或殺或縛，或復驅擯，或奪資財，名爲有罰。言有障者，謂有女人，身居卑賤，雖無親族，而有主礙，名爲有障。有障罰俱者，謂有女人，自無眷屬，又非卑賤，依恃他居，爲他所碍，若有凌逼，所依恃者，便爲加罰，名障罰俱。又上所說，一切女人，隨所依止，皆有障罰，所以者何？由諸女人，法有拘碍，非禮行者，便遭殺縛，或奪資財，或被退毀，是故一切，名障罰俱。何等名爲下至授擲花鬘等信？謂有女人，已受男子，或花或鬘，或諸瓔珞，或塗香末香，或隨一信物，如是名爲下至授擲花鬘等信。何等名爲於是等類？謂諸男子，諸半擇迦，諸修梵行，何等名爲修梵行者？謂諸苾芻尼，正學勤策女，及鄔波斯迦，出家外道女，下至在家脩苦行女，謂有男子，捨自妻媵，告言善賢，放汝自在，脩諸梵行，彼聞受持，苦行無怠，何等名爲起欲煩惱，廣說乃至不離邪

行，謂起欲界姪貪現前，於不應行，招誘強抑，共爲邪行，不厭遠離，如是名爲起欲煩惱，廣說乃至不離邪行。是故名爲欲邪行者。卽於此中，何等名欲，何名欲邪行，何名離欲邪行，而說名爲乃至命終，離欲邪行，鄔波索迦第三學處，所言欲者，謂是姪貪，或所貪境。欲邪行者，謂於上說，所不應行，而暫交會，下至自妻，非分非禮，及非時處，皆名欲邪行。卽前所說鄔波索迦，於欲邪行，能善思擇，厭患遠離，止息防護，不作不爲，不行不犯，棄捨堰塞，不拒不逆，不違不越，如是名爲離欲邪行。是故說名乃至命終，離欲邪行，鄔波索迦第三學處。

於第四中，且何名爲虛誑語者，如世尊說：有虛誑語者，或對平正，或對大眾，或對王家，或對執理，或對親族，同檢問言：咄哉男子！汝知當說，不知勿說！汝見當說，不見勿說！彼得問已，不知言知，知言不知，見言不見，不見言見，彼我爲己，或復爲他，或爲名利，故以正知，說虛誑語，不離虛誑，如是名爲虛誑語者。何等名爲有虛誑語者，謂於虛誑語，不深厭患，不遠不離，安住成就，如是名爲有虛誑語者。何等名爲或對平正，平正有三：一、村平正，二、城平正，三、國平正。此諸平正，聚集現前，同檢問時，名對平正。

何等名爲或對大眾，大眾有四：一、刹帝利衆，二、婆羅門衆，三、居士衆，四、沙門衆。此諸大眾，聚集現前，同檢問時，名對大眾。何等名爲或對王家，謂諸國王，及餘宰輔，理公務務者，彼若聚集，現前檢問，名對王家。何等名爲或對執理，謂閑法律，固正斷者，此執理衆，聚集現前，同檢問時，名對執理。何等名爲或對親族，謂諸親族，聚集現前，同檢問時，名對親族。何等名爲同檢問等，謂或爲證，或究其身，衆集量宜，同檢問曰：咄哉男子！今對衆前，應以誠言具款情實；若於是事，見聞覺知，宜當宣說，施設標示；若於是事，無見聞等，勿當宣說，施設標示；如是名爲同檢問等。何等名爲不知言知，謂爲耳識，曾受會了，名爲已聞；彼無耳識，曾受會了，隱藏如是想忍見樂，言我已聞，如是名爲不知言知。何等名爲知言不知，謂爲耳識，曾受會了，名爲已聞；彼有耳識，曾受會了，隱藏如是想忍見樂，言我不聞，如是名爲知言不知。何等名爲不見言見，謂爲眼識，曾受會了，名爲已見；彼無眼識，曾受會了，隱藏如是想忍見樂，言我已見，如是名爲不見言見。何等名爲見言不見，謂爲眼識，曾受會了，名爲已見；彼有眼識，曾受會了，隱覆如是想忍見樂，言我不見，如是名爲見言不見。何等名爲彼或爲己，謂有

一類，身行劫盜，王等執問：汝爲賊不？彼得問已，竊自思維：若實答者，必爲王等或殺或縛，或復驅擯，或奪資財，我今宜應自隱自覆，自藏實事，故以正知說虛誑語。既思維已，答王等言：我實不爲不與取事，是名爲己。何等名爲或復爲他？謂有一類親族知友，行於劫盜，王等爲證，執問彼言：汝知此人行劫盜不？彼得問已，竊自思維：若實答者，我諸親友，必爲王等，或殺或縛，或復驅擯，或奪資財，我今宜應隱覆藏彼，故以正知說虛誑語。既思維已，答王等言：我知親友，決定不爲不與取事，是名爲他。何等名爲或爲名利？謂有一類，多有所欲，多有所思，多有所願，作是思維：我當施設如是如是虛誑方便，必當獲得可意色聲香味觸等，既思維已，方便追求，故以正知說虛誑語。如是名爲或爲名利。何等名爲故以正知說虛誑語？謂自隱藏，想忍見樂，故思明了，數數宣說施設標示違想等事，如是名爲故以正知說虛誑語。卽於此中，何名虛誑？何名虛誑語？何名離虛誑語？而說名爲乃至命終，離虛誑語。卽波索迦第四學處。言虛誑者，謂事不實名虛想等不實名誑，是名虛誑。虛誑語者，以貪瞋癡違事想說，令他領解，名虛誑語。卽前所說卽波索迦於虛誑語，能善思擇，厭患遠離，心息防護，不作不爲，不行不犯，棄捨堰塞，不拒不逆，不違不越；如是名爲離虛誑語。是故說名乃至命終，離虛誑語。卽波索迦第四學處。

於第五中，何名諸酒？何名飲諸酒？何名放逸處？何名離飲諸酒諸放逸處？而說名爲乃至命終，離飲諸酒諸放逸處。卽波索迦第五學處。言諸酒者，謂宰羅酒，迷麗耶酒，及末沱酒。言宰羅者，謂米麥等，如法蒸煮，和麴蘖汁，投諸藥物，醞釀具成，酒色香味，飲已昏醉，名宰羅酒。迷麗耶者，謂諸根莖，葉花果汁，不和麴蘖，醞釀具成，酒色香味，飲已昏醉，名迷麗耶酒。言末沱者，謂葡萄酒，或卽宰羅迷麗耶酒，飲已令醉，總名末沱。飲諸酒者，謂飲咽啜如上諸酒。放逸處者，謂上諸酒，飲已能令心生憍傲，昏醉狂亂，不識尊卑，重惑惡業，皆因此起，放逸所依，名放逸處。卽前所說卽波索迦於飲諸酒，能善思擇，厭患遠離，心息防護，不作不爲，不行不犯，棄捨堰塞，不拒不逆，不違不越；如是名爲離飲諸酒諸放逸處。是故說名乃至命終，離飲諸酒諸放逸處。卽波索迦第五學處。

如是五種，云何名學？云何名處？言學處耶？所言學者，謂於五處，未滿爲滿，恒勤堅正，

脩習加行，故名爲學。所言處者，卽離殺等，是學所依，故名爲處。又離殺等，卽名爲學，亦卽名處，故名學處。

一切鄔波索迦，皆歸佛法僧耶？除諸世俗鄔波索迦，一切皆歸佛法僧寶。有歸佛法僧寶，而非鄔波索迦，謂苾芻、苾芻尼、正學勤策、勤策女、鄔波斯迦等。

一切鄔波索迦，皆世尊弟子耶？應作四句：有鄔波索迦，非世尊弟子；謂鄔波索迦，未得見諦，於未來果，未能現觀。有世尊弟子，非鄔波索迦；謂苾芻、苾芻尼、正學勤策、勤策女、鄔波斯迦等，已得見諦，於未來果，已能現觀。有鄔波索迦，亦世尊弟子；謂鄔波索迦，已得見諦，於未來果，已能現觀。有非鄔波索迦，非世尊弟子；謂苾芻、苾芻尼、正學勤策、勤策女、鄔波斯迦，未得見諦，於未來果，未能現觀。及餘異生未見諦者。

一切墮僧寶攝，皆得僧和敬耶？應作四句：有墮僧寶攝，非得僧和敬；謂正學勤策、勤策女、鄔波索迦等，已得見諦，於未來果，已能現觀。有得僧和敬，非墮僧寶攝；謂苾芻、苾芻尼，未得見諦，於未來果，未能現觀。有墮僧寶攝，亦得僧和敬；謂苾芻、苾芻尼，已得見諦，於未來果，已能現觀。有非墮僧寶攝，非得僧和敬；謂正學勤策、勤策女、鄔波

索迦、鄔波斯迦，未得見諦，於未來果，未能現觀，及餘異生未見諦者。

說一切有部法蘊足論卷第一